

左恪靖侯奏稿初編

恪靖奏稿初編卷二十一目錄

汀連龍漳分軍進剿大捷情形摺

請禁駐厦洋官私交髮逆摺

追剿獲勝汀連肅清現籌辦理情形摺

吳提督雇船來閩會剿請帶員弁差遣片

兩路進剿疊勝現籌辦理情形摺

附陳蘇軍到閩日期片

請卹全家殉難之詔安趙知縣片

舟師緝獲通賊洋匪解滬訊辦摺

請將會辦通逆洋匪之中外出力各員獎勵片
陳請浙省應解甘餉仍飭改撥摺

汀連龍漳分軍進剿大捷情形摺

奏爲汀連龍漳各軍分路進剿均獲大捷現籌辦理情形恭摺馳

奏仰祈

聖鑒事竊劉典王德榜王開琳張恆祥等軍由汀州連城進剿將下車南嶺馬洋洞涂坊賊巢攻破後均各移營進紮劉典復飭總兵楊芳桂參將劉大謨劉春藻進駐文石潭自率老中副後兩營緣山而進以期會合各軍分路攻剿正月二十二日劉典飭張福齊楊芳桂余

佑民劉大謨各營出馬洋洞之右李耀南彭俊光劉春
藩田向陽郭慶雲各營出新泉下車連破賊卡數十處
直逼南陽汪逆老巢該逆固匿不出二十三日劉典遣
親兵數十挑之該逆甫出比至山腳見有伏兵急退入
壘計兩日共殺賊五六百名拔出難民數千其王德榜
一軍於二十二日偵知古田之賊擄糧運至蛟洋密飭
各營馳往截剿殺賊百餘名生擒三十九名拔出難民
數百二十三日王德榜親率戴奉聘李運龍何秀清哈
必發肅得龍王福泰各營從馬洋洞間道進禾樹門立

破賊壘六座殺賊百餘名南陽之賊來援戴奉聘等回
旂力戰陣斬僞王宗汪海林等悍賊二百餘名生擒二
十四名賊敗走王德榜以古田不克後路堪虞二十四
日復飭李運勝鍾元興黎榮鈞三營攻古田之南自率
戴奉聘蕭得龍哈必發何秀清王福泰等攻古田之西
該逆分大股抗拒而輜重婦女潛向小池移去王德榜
急飭各營一面環攻城壘一面令哈必發何秀清率所
部出賊後擊之賊隊大亂官軍乘勢殺入斃賊千餘名
生擒百餘名解散者約數千李運勝鍾元興黎榮鈞等

乘勝逐北二十五日黎明追至小池賊尙屯踞未動見
官軍倏至拚死回撲李運勝等分路抄擊斃騎馬悍賊
數名逆賊千餘名賊大敗官軍蹙之而抵白吐忽見龍
巖城內火光燭天賊繞向坎頭鼠竄旋偵知龍巖州城
已爲康國器一軍攻破矣二十六日李運勝等始收隊
還其王開琳一軍亦於二十二日分飭總兵鄧榮達熊
常富新湘六營由左路出長橋自率各營進羅源嶺逆
賊拒險築卡官軍仰攻殊難王開琳飭莫坤和羅瑞山
龔隆貴丁長勝方有才各挑檐捷勇丁攜帶噴筒火箭

從兩邊山麓猱騰而上飭親兵張加勝徐金寶等六十人從中路鎗礮如雨中拔柵直入立斯卡外悍賊數名羣賊駭潰羅瑞山等乘勢焚其望樓立將羅源嶺隘攻克追過嶺後瞥見賊立石卡兩座傍以四壘護之羣賊蜂擁而出羅瑞山龔隆貴莫坤和丁長勝方有才等奮力衝殺陣斬黃衣賊目一名賊不少却適康榮詔魏友盛郭德馨等從嶺坳抄出兩路夾擊康榮詔等急擲火彈先燒石卡內草柵賊始奮路狂竄官軍正追殺間忽僞天將胡膳子率悍黨萬餘擁至各敗逆仍拚死回鬪

王開琳正飭各營堵禦聞新湘前營曾聚賢右營賀心
田左營楊大亨率所部從山嶺馳下羅瑞山與陸廣興
坤和丁長勝康榮詔魏友盛郭德馨文任重蔣日新等
各營從左右奮擊斃賊無算賊大敗追至茶樹下始收
隊還鄧榮達熊常富等從右路進至楠木嶺遇賊截擊
亦斬賊二三百名是役計共斃賊二千餘名生擒四十
餘名奪旗幟鎗礮各數百件其張恆祥一軍於二十一
日由南嶺攻破香塔賊卡殺賊百餘名餘賊向白雲嶺
井梵坑兩處藏匿二十二日進剿白雲嶺井梵坑又破

之殺賊數百名生擒黃衣賊目五名紅衣賊目三名長
毛悍賊三十七名奪馬十五匹正擬收隊適大股悍賊
從茶樹下撲出圍抄官軍後路經王開琳所部各營擊
敗紛紛竄至張恆祚飭總兵何映文等突前邀擊斃賊
無算生擒僞天將孫學保張鴻順等悍賊三十四名計
三日共斃賊一千餘名此正月二十一日至二十五日
各軍分路進剿汪逆破壘獲勝之實在情形也汪逆海
洋兇狡素著雖經迭次擊敗勢漸不支然其兇悍死黨
尙蓄銳以待意欲伺隙衝突以赴李逆之招二十七日

劉典飭道員李耀南副將張福齊所部各營會合王德榜一軍進新泉截之王德榜率所部五營由馬洋洞赴下車先進行至馬洋洞忽有賊目投文求降王德榜察其情詞有詐正研詰聞報稱汪逆已率悍黨數萬分路蜂擁而至王德榜督各營且戰且退收至新泉壘邊該逆一大股直撲王德榜營壘一大股直撲李耀南張福齊等營壘官軍分路迎擊余佑民郭慶雲田向陽三營首先陷陣李耀南張福齊兩營繼之劉大謨劉春藻楊芳桂三營正由下羅出新泉右路劉典亦親率中營出

新泉中路適見黃白號衣悍賊二萬餘分列田隴向前
猛撲余佑民督隊馳入賊陣立斬黃衣賊一名賊稍却
後面賊隊仍蜂擁而來郭慶雲田向陽朱定元蕭雅泗
周顯明等各率所部衝殺賊敗踞山邊汪逆海洋復驅
令回撲官軍勢幾不支李耀南張福齊等嚴督各營勿
退一步違者斬劉典策馬馳至分飭劉春藻劉大謨兩
營從旁抄襲自率親兵向前力戰各軍無不踴躍爭先
大呼奮擊逆賊屢却屢前官軍再接再厲縱橫決盪鏖
戰十餘合賊大敗走而新泉對岸之賊仍穩踞不動劉

典率親兵左右翼沿河疾進行甫半里汪逆海洋率死黨千餘拚死扼堵余佑民督隊首先陷陣李耀南張福齊劉大謨楊芳桂劉春藻郭慶雲田向陽等衝過山岡四面蹙之立斃黃衣悍賊數百名時王德榜亦將撲營之賊擊退率所部戴奉聘蕭得龍李運龍哈必發王福泰李運勝鍾元興黎榮鈞何秀清等分路衝殺而前該逆悉覓水向西岸逃竄逼溺死者無算退至下車劉典王德榜麾軍躡蹤前後夾擊又斃悍賊千餘名汪逆下馬痛哭勒諸賊回拒倉卒閒幾爲官軍所獲旋爲其死

黨擁之翻山逸去時已酉正始收隊還是役共斃賊五
六千名生擒四百名陣斬僞天將陳姓李姓等賊目多
名奪獲旂械洋鎗無數其僞開路先鋒胡瞎子爲賊中
兇悍頭目是戰亦爲官軍刀矛叢刺死據陣擒賊供汪
逆選諸賊之悍者合執大旂衣以黃白號衣名爲標旂
手厚待之遇有危急輒麾之向前自號無敵至是而喪
失過半矣此正月二十八日劉典王德榜兩軍擊敗汪
逆巨股克獲大勝之實在情形也其總兵劉明珍護汀
漳龍道趙均聞龍巖既克卽率所部進扼漳平南路永

福里見敗逆尙屯聚數十里內花旗丁逆太洋一股橫踞水潮和溪一帶二十七日劉明珍率所部黃本富張成元兩營及趙均所派練勇分路進剿令都司梁友武守備馬正林率勇二百名先往挑之該逆四五千入蜂擁而出梁友武等佯退誘至距和溪五里新林地地方劉明珍督各營突前奮擊賊勢不支紛紛潰走官軍追殺數里斃賊七百餘名解散者以千計奪騾馬二十餘匹旂幟刀矛無算是夜偵知敗賊復圖回踞新林劉明珍遣參將王啟發都司吳大邦率勇士三百名潛往襲之

殺賊數十名將賊卡三座踏毀此劉明珍趙均由漳平南路進剿獲勝之實在情形也其漳州踞逆自去臘圖竄長泰以襲同安被官軍扼截不能得逞待逆李世賢復於正月二十日分兩路竄犯漳浦高連陞黃少春聞賊犯漳浦卽飭護漳州鎮總兵郭什春督同已革副將惠壽參將顧飛熊所部一千三百人馳赴海澄飭已革遊擊許忠標一營馳赴石碼并會商二十七日出隊至河邊遙作攻城之勢以綴賊謀城賊見官軍齊出率眾來拒黃少春等督各營隔河環施鎗礮斃賊百餘名賊

敗走而九龍嶺之賊亦縮入城二十九日復有賊騎數十至好景山一帶馳騁誘敵高連陞派馬隊洋鎗隊逐之賊卽遁走追至橋邊伏賊突起洋鎗隊連環轟擊斃賊百餘名賊憑橋死拒官軍後隊齊至賊亦添悍黨數千併力拒戰曾光德程學明率所部沿河遶出賊後環擊兩時斃悍賊數百名賊大敗三十日辰刻高連陞忽聞河邊礮聲大作急率洋鎗隊及丁賢發和學明兩營馳往策應見悍賊三四千已破曾玉明丹洲陸營直趨鎮門師船俱已潰敗賊方跟追甚急程學明卽用鎗礮

隔河轟擊該逆未能遽逞高連陞卽飭洋鎗隊向前排
擊一面令遊擊蕭立信與丁賢發程學明各駕小艇飛
渡過河直扼丹洲並以劈山礮橫截小河斷其歸路轟
攻逾時賊始紛紛敗走官軍乘勝過河追殺賊急折奔
丹洲比至丹洲丁賢發蕭立信程學明三路突出衝殺
賊眾駭懼無措欲從小港鳧水而遁劈山礮又連轟不
息羣子如雨賊自相蹂藉及逼溺港中者無算高連陞
親督各勇馳至刀斫矛刺生擒悍逆三百餘名內有僞
侍府參府元助等百四十名奪獲馬三十餘匹侍逆旂

戰三百餘面時曾玉明臺勇亦從險橋馳至鄉團見賊大敗復爭出殺之遂將餘賊殲斃殆盡據陣擒賊供李世賢今日親率本隊悍黨數千欲從鎮門攻取石碼以絕官軍糧道不料一敗至此戰敗時李世賢猶乘一白馬殿後今見其馬爲官軍所牽不見李世賢或已覓水逃走不知生死統計待逆悍黨之得脫者不過百餘人而已此高連陞一軍截剿漳州踞逆李世賢克獲全勝之實在此情形也竊汪逆海洋頑踞南陽與李逆世賢實相首尾此次見官軍漸逼漸進妄冀衝破新泉營壘仍

分由下車古田趨龍巖入漳州與侍逆合併再圖內犯
侍逆不得逞於長泰復改圖南趨漳浦又親率悍黨欲
由鎮門窺石碼斷官軍糧道賊計均爲險毒幸兩路均
同時克獲大捷賊之精銳喪失過半兩逆均經重創膽
落可知以現在局勢論之江西廣東邊防尙固又入春
以來陰雨兼旬山水暴漲該逆竄越維艱侍逆又時遣
黨夥嗾其內犯現經官軍痛剿或仍思與漳州侍逆合
股以延殘喘亦未可知漳州南境地濱大海閩省師船
旣不足恃洋人又與之交通逆賊勢旣窘蹙無延頸待

戮之理此時自以嚴防下海爲要臣等現檄署衢州鎮
總兵記名提督劉清亮率所部由同安逕趨石碼以保
漳州東南一路咨新授水師提督吳全美速雇紅單拖
幫等船赴閩助剿以固海防昨准李鴻章咨稱已擬飭
署福建陸路提督郭松林記名提督楊鼎勛各率所部
雇坐輪船由海道赴廈門如各軍齊集斷賊入海之路
而汀連官軍節節掃蕩而下逼賊歸併一處鎖圍困之
庶東南餘逆可冀盡殲免致流毒他方又成不了之局
臣宗棠擬俟南陽肅清北路無慮卽督省籌商一切以

期安慎此次各路官軍以寡勝眾實由將領殫心竭力
得以速赴戎機署理浙江提督記名提督尙勇巴圖魯
高連陞忠勇出於性生克獲奇捷化險爲平戰功最偉
可否仰懇

天恩賞給清字勇號浙江補用遊擊丁賢發可否以副
將畱於閩浙補用軍功程學明可否以守備儘先補用
並

賞戴花翎花翎參將余佑民奮迅無前人最樸實可否
以副將畱於閩浙補用並

賞給勇號革職拏問花翎副將銜湖南補用參將劉大謨前以輕進獲咎此次奮勉出力應請免其拏問此外出力將士尙多可否由臣等存記彙

奏請

獎其力戰陣亡江西儘先補用副將哈必發肅清廣信弋陽及克復東鄉案內擬保總兵軍功王福泰擬保守備可否請

旨將哈必發照總兵陣亡例議卹王福泰照守備陣亡例議卹以昭激勸理合恭摺馳

奏伏乞

皇上聖鑒訓示施行再此摺係由臣宗棠主稿合併聲明謹

奏

同治四年二月十一日

議政王軍機大臣奉

旨另有旨欽此

同治四年二月二十七日內閣奉

上諭左宗棠等奏福建官軍分路進剿均獲大捷一摺
福建劉典等軍由汀州連城進剿直逼南陽汪逆老巢

分路環攻連日疊破賊壘數座正月二十四等日王德榜等分投環剿古田賊壘賊隊大亂官軍乘勢殺入擒斬甚多遂乘勝追至小池該逆拚死回拒各軍分路抄擊殲斃逆賊數千名賊大敗潰王開琳張恆祥等軍並將羅源嶺賊卡及香塔等處賊壘攻拔賊勢不支汪逆海洋意圖伺隙衝突與李世賢合以劉典復督諸軍會合王德榜所部由新泉截剿該逆峰擁來撲官軍分隊迎擊縱橫盪決鏖戰多時賊大敗潰日逆仍在新泉對岸糾眾死拒劉典自率親兵各隊衝過山岡四面蹙剿

陣斃悍賊千數百名汪逆下馬痛哭勒諸賊回拒幾被
官軍擒獲旋爲死黨擁護逃去劉明珍因龍巖既克督
軍進扼漳平南路逆匪丁太陽橫踞水潮和溪一帶突
出四五千入撲犯官軍各營直前奮擊逆眾奔潰官軍
追殺數里斃賊甚多並踏毀賊卡三座其漳州踞逆李
世賢於正月二十等日分路竄犯漳浦高連陞等分督
諸軍由海澄石碼等處進攻城內賊匪率眾出拒官軍
隔河環施鎗礮斃賊百餘名餘賊敗走復有賊騎數十
在好景山一帶遊弋高連陞派隊躡擊追至橋邊伏賊

突起官軍洋鎗隊連環轟擊並分兵繞出賊後兜剿擊斃悍賊數百名賊大敗潰三十日該逆突出悍賊三四千襲撲官軍丹洲陸營高連陞飭洋鎗隊向前排擊並飭蕭立信等駕艇渡河扼剿以劈山礮截賊歸路轟攻逾時賊眾潰敗自相蹂躪溺斃港中者甚多高連陞親督勇隊生擒悍逆三百餘名奪馬匹旗幟無算餘逆殲除殆盡據生擒賊供侍逆李世賢已斃水逃逸剿辦甚爲得手著左宗棠督飭諸軍迅卽乘勝掃除餘匪殲擒首逆以靖地方此次尤爲出力之提督高連陞著賞給

穆特本巴圖魯名號遊擊丁賢發著以副將畱於閩浙
補用軍功程學明著以守備儘先補用並賞戴花翎參
將余佑民著以副將畱於閩浙補用並賞給龍勇巴圖
魯名號已草參將劉大謨著免其掣問其餘出力員弁
著左宗棠等存記彙案擇尤請獎其陣亡之擬保總兵
江西儘先副將哈必發著照總兵陣亡例議卹擬保守
備軍功王福泰著照守備陣亡例議卹以慰忠魂該部
知道欽此

議政王軍機大臣 字寄廣州將軍署兩廣總督瑞麟

閩浙總督一等伯左宗棠江西巡撫沈葆楨福建巡撫
徐宗幹署廣東巡撫郭嵩燾同治四年二月二十七日
奉

上諭左宗棠等奏福建官軍擊賊大勝請將出力陣亡
各員獎卹一摺本日已明降諭旨將提督高連陞等照
所請獎勵並將副將哈必發等交部議卹矣劉典王德
榜等軍進剿汪逆疊破賊壘續獲大勝該逆大興逸去
幾爲官軍所獲劉明珍等軍扼漳平一路踏毀丁逆賊
卡三座高連陞截剿漳州踞賊大獲勝捷李世賢棄馬

而逃其悍黨已喪失殆盡現在汪逆勢窮圖與侍逆合股漳州南境地濱大海賊勢窘蹙難保不勾結洋人計圖入海左宗棠已飭提督劉清亮率所部由同安逕趨石碼以保漳州東南一路令吳全美速雇紅單拖罾等船赴閩助剿以固海防所籌均極妥協著卽激勵各軍覘賊所向會師夾擊該逆大敗之餘其膽已寒不難一鼓殄滅左宗棠當督飭劉典高連陞等分路布置務須就地殲除毋任他竄汪逆李逆逃往何處責令帶兵各將弁追截勿任合併一處郭松林一軍當已到閩著派

令嚴扼海口并防其勾串洋人計圖竄逆又成不可之
局汀漳賊眾未盡剿除江西廣東之防仍不可一日或
懈沈葆楨尙未回籍著飭令派出各軍認真防範勿稍
鬆勁廣東所派出境助剿之方耀等軍著瑞麟郭嵩燾
飭令會合閩軍痛殲餘逆潮州大埔一帶卽責成李福
泰妥籌防剿以杜窺伺該逆既有入海之謀各海口均
應一體防範並著瑞麟等督飭地方文武員弁悉心籌
防倘被闖入定惟該地方官是問決不寬貸將此由六
百里各諭令知之欽此

請禁駐厦洋官私交髮逆摺

奏爲駐厦洋官私交髮逆請

敕下總理各國衙門傳諭駐京英國公使嚴行查禁辦理合詞恭摺奏祈

聖鑒事竊據興泉永道鄧廷枏稟稱正月十九日接准署水師提督曾玉明函開十八日有洋人駕坐小舢舨船三隻隨潮駛過差弁往詢不聽稽查直入新橋賊卡登岸入漳等因當卽照會英國領事官怕威林去後迨二十一日該領事邀集厦門文武面稱前次李世賢遣

人送信到厦被洋關拏解地方官正法其信中是何議論不能知悉是以親赴漳郡面會李世賢以後有信來往不可攔阻有事自能知會現帶長毛頭目一個在戰船官金順船內稍緩幾日仍擬送伊回漳官民欲截港拏辦必至開仗至照會內小舢舨船三隻係我駕坐入漳之船不必再查等情查逆匪被剿窮蹙勾串洋人計圖免脫早在意計之中卽飭在事文武嚴爲防範前獲遞送逆書陳金隴一名當卽審明正法並查出與賊貿易之洋人惹隔孫蒲浪二名照會懲辦業經臣英桂等

馳奏在案此次駐厦英國領事官柏威林入滯與侍逆
見面一節臣等先有風聞當卽一面行查一面飭令海
關委員協領長慶通商委員署福州府知府丁嘉璋傳
諭駐福州口英國領事官有雅芝稅務司美里登囑其
寄信查問據有雅芝等回稱此事柏威林實屬無禮惟
伊等係屬同官權不能制應由駐京公使將柏威林撤
回等語並據該道鄧廷枏具稟前情查各國駐口領事
官原以約束洋人勿許滋事今柏威林乃以前次爲侍
逆送信之犯被洋關拏解地方官正法輒藉詞親赴賊

三
巢與侍逆會面經該道等再三婉勸竟不聽受反帶賊
目藏在戰船故違和約叵測情形殊難懸度除由臣等
仍飭在事文武嚴加防範妥籌辦理外應請

旨飭下總理各國衙門傳諭駐京英國公使迅將該領
事官柏威林撤換以弭後患除飛咨總理各國衙門在
照外臣等謹合詞恭摺由驛六百里具奏伏乞

皇太后

皇上聖鑒訓示謹

奏

同治四年二月十一日

議政王軍機大臣奉

旨該衙門知道欽此

追剿獲勝汀連肅清現籌辦理情形摺

奏爲官軍追剿獲勝汀連肅清現籌辦理情形恭摺馳
奏仰祈

聖鑒事竊劉典王德榜王開琳張恆祥等由汀州連城
進剿南陽汪逆海洋老巢疊次獲勝賊勢日蹙劉典料
賊竄必速二月初三日派總兵楊芳桂副將張福齊會
同王德榜所部總兵戴奉聘李運勝兩營馳赴中村截
擊初四夜南陽之賊果棄巢竄走知縣陳鴻藻副將文
繼昌卽率所部由亨子嶺殺入斃賊數百名初五日楊

芳桂張福齊戴奉聘李運勝等追至上杭所轄舊縣又
殺賊數百名時上杭縣聯甲隨粵軍方耀擊賊於距城
十餘里之石腳下亦獲大勝劉典慮賊由龍巖內竄當
飭道員李耀南已革參將劉大謨於初六日進駐華家
亭適賊由舊縣竄踞白沙張福齊等率隊追至李耀南
劉大謨與參將樂連生余佑民都司劉春燦軍功田向
陽等分路夾擊殺賊五六百名生擒百餘名奪騾馬二
十餘匹拔出難民千餘初七日劉典復率所部會同王
德榜進剿白沙賊拚死抗拒張福齊李耀南分飭郭慶

雲彭俊光陳鴻藻余佑民樂連生田向陽各率所部猛
進殺賊三四百名賊退里許仍率眾回關後路之賊亦
蜂擁而來劉典督各營奮威衝殺郭慶雲彭俊光陳鴻
藻率隊繞出賊前四面蹙之賊因人眾路仄退步甚艱
拒戰益力官軍奮擊兩時殺悍賊頗多賊仍拚死抗拒
郭慶雲怒馬衝入賊陣直取汪逆中鎗陣亡勇丁死者
二十餘人官軍因之少却李耀南劉春藻余佑民田向
陽張星元楊芳桂劉大謨復奮前接戰適王德榜所部
蕭得龍黎榮鈞鍾元興等將李塘伏賊擊敗乘勢追過

田隴王德榜親督何秀清李運龍兩營繼之並飭戴奉聘李運勝李金信等抄出賊後截擊適康國器由龍巖飭所部營官羅洪標哨弁康德修羅魁陳羅等馳至奮威衝殺賊遂大奔沿山潰竄官軍合追十數里始還計是役共斃賊數千名生擒數百名拔出難民無算其王開琳一軍聞南陽賊竄亦分路疾追甫抵茶樹下悍賊四五千尙拚死來撲王開琳督各營力戰丁長勝魏友盛莫坤和郭德聲從左路破其兩壘殺賊約三四百名汪逆畱殿後悍賊數千併力回拒官軍擊逾時賊仍

敗竄初六日王開琳督新老湘營蹣跚追擊逆賊自
且退遂向永定縣屬坎市竄去比官軍追至汪逆復由
坎市竄龜陽此南陽賊竄各軍追剿獲勝汀連肅清之
實在情形也其總兵劉明珍護汀漳龍道趙均由漳平
進紮南路永福里將和溪踞逆擊敗後初三日劉明珍
飭岳炳榮黃本富張成元三營並趙均紳勇進攻板塢
後壩賊卡破之殺賊五六十名初四日和溪之賊糾添
水潮悍賊數千來撲張成元周占元營壘劉明珍趙均
派隊馳往策應而自率所部繞攻和溪守備梁友武破

卡直入逆賊紛紛潰竄時張成元將撲壘之賊擊退亦率隊追至與劉明珍分投夾擊斃賊數百名立將和溪賊壘掃蕩初五日乘勢攻進水潮丁逆太洋率眾數千來拒劉明珍等督隊奮擊斬騎馬賊目十餘名賊敗急棄水潮而遁計兩日共斃賊千餘名拔出難民無算奪騾馬五十餘匹旗幟刀矛三百餘件此劉明珍趙均由漳平南路進剿獲勝之實在情形也竊汪逆海洋經官軍疊次痛剿實圖竄越江西因江西防邊兵力厚集不能竄越又侍逆已爲高連陞所敗漳逆呼援甚急圖與

汪逆合股漳逆於正月二十日分黨窺犯漳浦二十一日竄陷縣城現復遣黨屯踞南路官田顏厝前一帶以窺石碼並喉龍巖敗逆由北路圖犯長泰臣宗棠於南陽逆賊未竄之先卽慮賊勢趨併於此乘隙內竄黃少春高連陞兩軍兵力尙單難以兼顧飭張恆祥一軍移駐漳平劉清亮一軍由同安相機前進現高連陞黃少春分軍駐石碼扼北溪布置尙周而南陽肅清後王德榜已赴龍巖劉典亦率所部馳赴漳平漳州西北一帶以刻下局勢論之北路應嚴扼華封同朝天嶺諸隘由

和淡水潮進剿南靖南路應嚴扼石碼進窺漳浦李鴻
章所派署福建陸路提督郭松林記名提督楊鼎勛兩
軍由上海雇輪船赴閩閩三月初旬始可抵厦臣等會
商擬俟兩軍至厦卽由海澄進取漳浦先斷其入海之
路然後由九龍嶺木棉港會攻漳城並杜其竄粵之路
其王開琳所部新老湘營已飭移紮永定河邊兼顧上
杭以扼其奔竄江西能將汪海洋李世賢兩大股於閩
境殲除則丁太洋林正揚等賊亦無能爲矣至於記名
提督婁雲慶接統鮑超所部整理未曾就緒並未入閩

現賊既趨併南靖漳州汀防稍鬆即可仍畱江境臣宗
崇擬俟劉典抵漳平後將北路軍事布置稍定再進省
籌辦一切如須赴泉州同安督剿卽當出省辦理所有
此次力戰陣亡之藍翎把總康德修軍功郭慶雲計功
應保守備可否仰懇

天恩俯准飭部照守備陣亡例議卹以慰忠魂理合恭
摺馳

奏伏乞

皇上聖鑒訓示施行再此摺係臣宗崇主稿合併聲明

謹

奏

同治四年二月二十八日

軍機大臣奉

旨另有旨欽

軍機大臣

字寄廣州將軍署兩廣總督瑞麟閩浙總

督一等伯左宗棠福建巡撫徐宗幹署廣東巡撫郭嵩

壽傳諭護理江西巡撫布政使孫長綬同治四年三月

十四日奉

上諭左宗棠等奏官軍進剿獲勝汀連肅清現籌辦理

情形一摺劉典等軍由汀州連城進勦南陽汪逆老賊
賊棄巢走白沙之賊亦經劉典會同王德榜等軍奮力
衝擊賊勢大潰沿山奔竄汪逆留殿後悍賊數千併力
回拒亦經官軍擊敗汪逆由坎市龜陽竄去汀州連城
一律肅清劉明珍等由漳平南路進勦和溪掃蕩賊壘
乘勢進攻水潮丁逆棄水潮而遁侍逆爲高速陞所敗
呼援甚急圖與汪逆合股漳州踞逆竄陷漳浦現復遣
黨屯踞南路官田顏厝前一帶以窺石碼並嗾龍巖敗
逆由北路圖犯長泰左宗棠已飭張恆祥一軍移紮漳

平劉清亮一軍由同安相機前進高連陞等分軍駐石碼扼北溪王德榜已赴龍巖劉典亦馳赴漳平漳州一帶布置均尙周密逆勢現已窮蹙惟當防其就近入海勾結洋盜各處竄擾郭松林等計可由滬抵閩著左宗棠徐宗幹卽飛飭由海澄進取漳浦斷其入海之路吳全美已雇募紅單拖罾等船赴閩著飭令嚴扼海口遇賊卽擊毋稍疏懈該督撫務當檄飭南北兩路規取南靖漳浦將汪李等逆就地殲除勿任再行紛竄該逆飛走技窮豈肯坐以待斃必將拚死出竄廣東江西邊境

以圖一逞著瑞麟郭嵩燾飭令李福泰等軍使嚴防潮州及埔饒等處方耀等軍已入閩省卽令歸左宗棠調遣倘粵邊有警仍令回顧沈葆楨已起程赴閩孫長紱責無旁貸當飭令前隊防軍嚴扼本境如被闖入完善惟該署督撫等是問婁雲慶接統鮑超所部旣未入閩卽著仍畱江境協同防守俟此股賊平仍遵前旨馳赴鮑超軍營隨同出關剿賊左宗棠俟劉典到後布置定妥再行進省辦理一切事宜此次力戰陣亡之藍翎把總康德修軍功郭慶雲均著交部照守備陣亡例議卹

以慰忠魂將此由六百里諭知瑞麟左宗棠徐宗幹郭
嵩燾並傳諭孫長紱知之欽此

吳提督履船來閩會勦請帶員弁差遣片

再新授福建水師提臣吳全美業經臣等

奏明飭令速雇紅單拖罾等船來閩助剿以固海防在
案茲准吳全美咨請隨帶久歷大洋最稱諳練之水師
記名總兵李廷邦李廷勳儘先副將吳奇勳李廷芳儘
先參將李榮升丁泰郭祥有吳泰芬周振邦儘先遊擊
陳起龍梁汝魁儘先都司黃昌貴黃定邦儘先守備吳

安魏惟松吳顯安儘先千總蘇桂森黃定暉馮榮福儘
先把總羅世恩等二十員名來閩差遣就近歸於閩省
候補等情前來除飛咨廣東督撫臣查照在於福建協
餉籌撥洋銀一萬兩以爲勇糧船價卽由吳全美雇募
紅單船二十號拖帶船數十號配足官兵勇軍火礮
械統帶來閩馳赴廈門會合剿辦外理合附片陳明謹
奏請

旨 同治四年二月二十八日

軍機大臣奉

旨知道了欽此

兩路進剿疊勝現籌辦理情形摺

奏爲官軍兩路進剿疊獲大捷現籌辦理情形恭摺馳
奏仰祈

聖鑒事竊汀連肅清後汪逆海洋由坎市退竄南靖永定
交界之奎洋苦竹梅林山城金豐等處李逆世賢於
漳州東北浦南金沙烏頭門社一帶添築城壘以圖繞
襲漳州官軍後路署浙江衢州鎮總兵劉清亮馳抵江
東橋見賊勢方趨重漳北卽率所部進紮北溪黃少春
進紮北尾橋高連陞進紮東路好景山以相聯絡二月

二十五日黃少春復飭副將周紹濂遊擊劉昌選謝復雲移紮北尾橋對港翰林洲詎漳城東北樓內寨賊首僞天將譚姓率悍賊千餘來撲周紹濂謝復雲營壘常經官軍擊退黃少春馳至見賊尙憑橋抗拒復率親兵馬隊從左路謝復雲從右路抄擊賊卽潰敗官軍追殺過橋斃賊二百餘名二十六七日亦迭有斬獲三月初二日城賊復出數萬一由崎下橋北尾橋一由打鼓山分數路來犯黃少春率周紹濂謝復雲劉昌選各營從右路迎擊斃大旗悍賊十餘名賊卽敗竄追至田東

社伏賊突起官軍鏖戰十餘合賊拚死抗拒周紹濂戰馬帶傷卽挺矛衝入賊陣謝復雲督各哨突前猛擊賊不能支時高連陞亦將崎下橋北尾橋之賊擊敗衝殺而前該逆恐官軍過港截殺悉向樓內遁去計是役共斃悍賊三百餘名初七日高連陞率所部進紮響水橋初九日復率副將丁賢發軍功錢桂仁兩營過河築壘逼之黃少春飭各營伏於北尾橋河邊自率親兵馬隊與高連陞從東關大路而進突遇賊一二千人高連陞卽飭洋鎗隊馬隊奮前擊殺黃少春督隊繼之賊且戰

且退追至東關斃賊百餘名忽南門壘賊數千從河邊抄至城賊與東門壘賊亦合數千蜂擁而出高連陞飭張志公程學明扼堵河邊自率洋鎗隊與黃少春分堵東路猛戰十餘合斃騎馬賊目一名悍賊數名賊稍却急麾軍奮力齊進賊退入卡程學明張志公將河邊之賊擊敗亦率隊馳至環攻賊卡忽西門外賊八九千人又繞至對港排列高連陞黃少春飭各營鎗礮環擊斃賊數百名當賊由東路來犯也北門及城內亦各出賊數千向北尾橋衝來周紹濂湯復春伍先申等督隊迎

擊黃少春率謝復雲等從左路橫出截之賊敗走計是役傷賊斃賊共千餘名奪旗幟鎗礮百餘件該逆復糾添汪逆悍賊約五六萬於十三日展刻分路一撲響水橋一撲北尾橋營壘其由響水橋一路來者高連陞督各營力堵並令魏光祚朱體盛兩營過崎下橋扼之朱體盛由板上進剿斃賊數十名正追殺間忽弓股賊七八千人經魏光祚擊敗退併板上抄出朱體盛隊伍之後朱體盛督隊接戰勢幾不支魏光祚急馳而前將賊擊退乘勝躡追賊復率眾回撲魏光祚怒馬陷陣鎗斃

悍逆二名賊眾披靡時黃少春一軍亦已得手逆賊紛
紛潰竄官軍追殺斃賊百餘名其撲響水橋之賊亦經
張志公曹光德擊敗斃賊二百餘名洋鎗隊乘勢急追
賊拚死回拒曹光德用刀矛刺殺二十餘賊高連陞親
督各隊馳至賊仍敗走追至港邊侍逆李世賢僞天將
李學金復喚各賊回鬪並出洋鎗賊千餘前來助戰官
軍縱橫決盪鏖戰逾時曹光德戰馬被賊鎗子擊傷卽
下馬持矛刺倒數賊乘勝猛進馬隊繼之忽從逆洋匪
十餘名突出賊前擊洋鎗向官軍排擊斃馬一匹傷馬

數匹官軍憤甚馳入賊陣立斬洋匪二名羣賊縮入村
後程學明錢桂仁率親兵疾追高連陞督隊壓擊賊勢
不支分向東關敗竄其由北尾橋一路來者黃少春率
中營及副將李良平左營參將伍先申馬隊迎擊相拒
半時樓內伏賊數千從西岡山突出官軍奮威衝殺斃
賊多名侍逆又麾洋鎗悍賊並馬賊數百拚死來撲李
良平等督隊猛進鏖戰兩時斃賊甚多賊仍死拒不退
黃少春親督各哨向前衝突坐馬被賊擊傷下馬持矛
督戰士卒益奮陣斬悍賊百餘名戮斃賊馬十餘匹適

高連陞所部魏光祚將賊擊退從崎下橋橫截而來兩路大擊賊遂大敗官軍追至距東關半里許始收隊還其樓內來援之賊經總兵劉端冕副將馬駿發劉昌選周紹濂謝復雲等截殺斃賊二百餘名計是役共斃賊二千餘名傷賊不計其數奪所幟洋鎗二百餘件官軍陣亡受傷者亦百餘名十四日城賊壘賊復出數萬分兩路夾撲北尾橋營壘黃少春當飭周紹濂劉昌選謝復雲將由右手過河李良平劉端冕馬駿發等由左手過河黃少春親督中營及伍先申馬隊居中策應三路

奮擊斃賊數百名其束路之賊圖撲高連陞營壘經高連陞派隊擊殺二十餘名賊施遁去高連陞見賊迭次來撲皆由赤嶺先犯丁賢發營壘十六日飭朱體盛副湘右營疾赴赤嶺南部院祠扼紮一面飭各營嚴陣以待一面函商福建陸路提督郭松林黃少春俟賊來撲卽各率所部合力痛剿李逆世賢以兩次猛撲皆不得逞復嗾南靖來援之賊萬餘並城壘各逆合共十餘萬蜂擁而出並用開花礮向前轟擊見官軍屹立不動乃分四路抄來適郭松林率所部蘇軍五營馳至卽與高

連陞各營踰赤嶺迎擊黃少春率各營過北尾橋迎擊
福州稅務司美里登時由廈門海澄來營觀戰亦帶開
花礮助勦各軍併力齊進呼聲震天郭松林親督小隊
直搗中堅羣賊辟易官軍乘勢急進各路之賊俱敗李
逆世賢復督各賊回撲官軍奮威衝殺洋鎗隊斜出轟
擊子如雨注賊勢不支捨命狂竄自相蹂藉及轟斃溺
斃者不可勝數追過港橋酉刻收隊其另股排列流岡
山一帶者意圖乘虛撲黃少春營壘經劉端冕馬駿發
等排鎗轟擊劉目選督隊力戰斃賊二百餘名仍向樓

內遁去計是役共殺賊三四千名帶傷者以萬計奪旅
幟鎗礮無算此二月二十五日至三月十六日高連陞
黃少春等軍迭次進剿克獲大捷之實在情形也其王
德榜一軍由龍巖馳赴漳北華封見逆賊一大股廣聚
北路豐山對岸金沙一帶遂分兩營畱駐豐山自率所
部進紮潭口與劉清亮渡東溪環各營互相聯絡正擬
搭造浮橋過河痛擊詎該逆見官軍逼近十四日於吳
倉烏頭添築兩壘十五口又於對岸河邊添築四壘阻
官軍進攻之路王德榜飭遊擊戴清輝黎榮鈞鍾元興

都司李運龍從上流過河總兵戴奉聘李運勝參將何
秀清軍功李金信從下遊過河並排列劈山礮對河轟
擊逆賊不支棄壘而遁官軍兩路夾擊斃賊二三百名
此王德榜一軍由漳北進剿獲勝之實在情形也其劉
典一軍馳抵龍巖後卽率所部進駐州南六十里適中
飭副將張福齊同知楊鼎勛進紮上坪總兵楊芳桂紮
水尾邊道員李耀南紮村東偵知汪逆率敗賊分拒上
下奎洋梅林塢校施洋苦竹金豐等處縱橫數十里代
片賊氛而奎洋係通南靖漳州大路地勢尤爲險要十

五日飭張福齊楊鼎勛參將彭俊光宋定元劉春藻軍
功蕭雅泗由白石埧進參將周顯明余佑民樂連生知
縣陳鴻藻軍功田向陽由上下嶼進都司張景元遊擊
徐萬福由坑下防梅林之賊劉典親率楊芳桂齊蘭禮
等山嶺頭前進張福齊楊鼎勛甫抵白石埧遇賊數百
適大霧彌漫咫尺不辨賊不意官軍驟至誤以爲其黨
也就之官軍突起奮殺斃賊二百餘生擒百餘名劉典
抵嶺頭亦與賊遇楊芳桂齊蘭禮率隊圍殺生擒五十
餘名斃賊百餘名陳鴻藻余佑民等抵溫上擒賊二十

餘名徐萬福等抵坑下擒賊三十餘名拔出難民無數
劉典等翻山行十五里至奎洋山頭俯覘賊巢見賊方
併趨右路卽飭各營截之該逆見官軍突出其後改向
奎洋山頭撲來適張福齊楊鼎勛等由右路齊蘭禮楊
青山等由左路殺出劉典復飭新兵繞出賊後截之血
戰一時斃賊數百名賊敗走下奎洋援賊又分數路而
來劉典又督各營奮力迎擊斃賊多名賊仍敗歸下奎
洋壘中其梅林之賊率黨來援亦經張福齊楊鼎勛派
隊擊退計是役共斃悍賊千餘名生擒三百餘名拔出

難民七八百名奪旂幟軍械無算此劉典一軍由龍巖
進剿奎洋克獲大捷之實在情形也其總兵王開琳一
軍馳抵永定後分所部入營扼紮距城三十里湖雷鄉
偵知偽天將周正福偽佐將譚如春等率眾萬餘圖撲
永定縣城並分犯湖雷營壘十六日王開琳飭各營分
路迎擊羅瑞山龔隆貴郭德馨等行至跌馬寨遇賊接
仗斃賊多名賊敗走各營乘勢追過岐嶺王開琳恐下
洋有賊抄襲正飭莫坤和魏友盛兩營伏於跌馬寨自
率中營並新湘三營仍合前隊緊追忽賊千餘從山後

突至莫坤和魏友盛督隊迎擊賊亦拚死抗拒王開琳
飭曾桂堂賀心田楊大享等先截其歸路各營四面蹙
之除生擒及收降百餘名外圍剿殆盡羅瑞山龔隆貴
知後股殲滅幾盡卽躡蹤緊追適湖雷各營亦從東坑
馳至夾擊擒斬甚眾計是役共斃賊二千餘名生擒偽
佐將譚如春僞指揮周正南等七十餘名奪獲驃馬三
十五匹旂幟鎗礮各數百件此王開琳一軍田永定迎
剿獲勝之實在情形也竊惟賊勢自汀連肅清後汪逆
竄距龍巖永靖南定王界各處地方與侍逆李世賢相

爲首尾其地可由永定武平竄江西廣東可由平和竄
廣東侍逆堅踞漳城分其黨踞雲霄平和近自漳浦失
守後丁逆大洋復由平和陷詔安其地緊連廣東潮嘉
濱海之區素多盜艇出沒以賊情言之汪逆志在竄江
李逆志在入海然現在閩軍攻急則必以粵東爲退步
徐圖逞其竄江下海本謀論防賊下海之路在粵則潮
屬之汕頭在閩則詔安之銅山碇口爲要就現在賊勢
言之則閩之銅山碇口爲尤急亦知賊數眾多海船難
敷裝載賊雖妄圖下海勢必不能密制之於陸尙易爲

力制之於海實難爲功斷宜於事先盡力籌惟未容緩
視臣宗幹於漳浦失守時已調省防蕭端芳紅單船六
號駛赴碇口臣宗棠現又飛催水師提督吳全美速帶
所雇紅單船二十號拖督二十號駛赴銅山其未到防
之先已由曾憲德鄧廷枏就近派撥師船前往防守矣
論防賊入粵之路惟饒平大埔最爲衝要粵軍防邊關
尙周密方耀一軍亦已調回兵力似爲不薄然臣等接
閱署撫臣郭嵩勳來書仍以驅賊入粵爲疑而聞軍方
由東而西由北而南雲霄平和漳浦詔安中隔賊氛實

無兵力可以繞越兼顧竄思江西防兵爲厚汀連旣清
賊之竄江惟永定一路臣等現籌總兵王開淋之新老
湘營共計七千餘人康國器及關鎮國所部共五千餘
人嚴防永定湖雷撫溪一帶足以遏賊奔衝莫雲慶一
軍萬餘近始由江西赴武平尙在王開琳康國器之後
於援閩防江均屬不急之著而武平距粵咫尺似可和
緩就急爲江西助粵之軍庶粵東固而由粵竄江西之
路亦可無虞伏乞

皇上飭下江西撫臣廣東撫臣爲該軍妥籌接濟相機

調撥以近收聚殲之效至閩省自永定至長泰北路要隘均有布置漳州東路有高連陞黃少春兩軍屹如山立連日眾賊猛撲均已擊敗逆賊雖揚言深竄腹地諒可無虞臣等現已飭王德榜劉清亮等迅將漳北各賊掃除漸逼漸進其漳南一路蘇軍已到十營十六日郭松林率五營五成洋鎗隊助戰甚爲得力楊鼎勛一軍於十七日到廈足扼石碼海澄並截侍逆南竄漳浦之路臣等自當隨時商調慎以圖之務將逆賊聚殲以紓

聖屢此次各路官軍奮勇擊賊以寡勝眾實屬異常出力浙江卽補知府魏光祚請

賞加道銜遊擊銜補用都司曹光德請以參將畱閩補用藍翎同知銜通判龍朝翼請

賞加知府銜擬保花翎遊擊銜都司張藝勝請以遊擊補用花翎守備李松林請以都司補用其餘出力員弁甚多可否由臣等存記彙案請

獎其力戰陣亡之擬保遊擊黃柳溪擬保遊擊銜花翎都司李文質遊擊銜花翎都司陳道政擬保都司銜守

三才集卷三
備羅福清均請

飭部照擬保官階議卹以慰忠魂所有剿賊獲勝及籌
辦情形謹據實馳

奏伏乞

聖鑒訓示施行再此摺由臣宗棠主稿合併聲明謹
奏 同治四年三月二十九日

軍機大臣奉

旨另有旨欽此

同治四年四月十五日內閣奉

上諭左宗棠等奏各路官軍迭獲大勝請將出力暨陣亡員弁分別獎卹一摺髮逆李世賢於漳州東北一帶添築城壘計圖繞襲官軍後路經高連陞黃少春分路進攻自二月二十五日至三月十六日迭獲奇捷殺斃賊匪不下萬餘羣賊潰退王德榜一軍由龍巖馳赴漳北亦將金沙一帶賊壘攻拔斃匪數百名其逆首汪海洋一敗竄至南靖永定交界之奎洋等處勢極猖獗經劉典一軍進剿血戰逾時賊敗入壘並將梅林援賊擊退殺死悍逆千餘名生擒二百餘名正法王開琳亦率

老湘營將圓攻永定縣城等匪剿敗殺賊數千生擒僞
佐將譚如春等七十餘名餘逆潰遁剿辦均爲得手著
左宗棠督各軍迅將漳州等城克復殲除巨憝毋畱餘
孽所有在事出力之知府魏光那著賞加道銜都司曹
光德著以參將畱於福建補用通判龍朝翼著賞加知
府銜都司張藝勝著以遊擊補用守備李松林等以都
司補用其餘出力員弁著左宗棠存記彙案請獎陣亡
之擬保遊擊黃柳溪擬保遊擊銜花翎都司李文質遊
擊銜花翎都司陳道政擬保都司銜守備羅福清均著

交部照擬保官階議卹以慰忠魂欽此

軍機大臣 字寄廣州將軍兼署兩廣總督瑞麟閩浙
總督一等恪靖伯左宗棠福建巡撫徐宗幹署廣東巡
撫郭嵩燾傳諭護理江西巡撫布政使孫長紱同治四
年四月十五日奉

上諭左宗棠徐宗幹奏官軍兩路進剿迭獲大捷現籌
辦理情形一摺本日已明降諭旨宣示出力陣亡各員
照請獎卹矣前據瑞麟等奏閩賊趨重西面恐以粵東
爲去路當經諭令左宗棠調兵分布截其西竄之路茲

據左宗棠等奏請開省自永定至長泰北路要隘均有
布置漳州東路有高速阻截少春兩軍連日將賊眾擊
敗腹地亦可無虞漳南一路有郭松林等軍截扼是東
南北三面布置均尙周密惟西路之雲霄平和漳浦詔
安等處賊氛甚熾左宗棠等亦虞其閩軍攻急必以粵
東爲退步徐圖逞其竄江下海之謀現已調王開琳康
國器等軍嚴防永定一帶足以遏賊奔竄而婁雲慶一
軍萬餘人現在武平距粵較近正可移緩就急爲江西
助粵之軍著孫長絨卽飭婁雲慶統帶所部迅速前進

瑞麟郭嵩燾一面迎提相機調撥以保邊防所有該軍
餉需卽由江西廣東兩省源源接濟毋令缺乏饒平大
埔爲粵省要隘之路方耀一軍已經調回本境粵邊防
軍亦爲不薄瑞麟郭嵩燾務當督飭李福泰等實力嚴
防如遇賊蹤竄近卽飭各軍迎頭截擊毋得專待客兵
致多貽誤永定一帶現有重兵屯紮江西邊防尙可無
慮惟汪逆既有竄江之意孫長絳亦當先事防維勿稍
大意現在漳州之賊迭經官軍痛剿其勢漸蹙左宗棠
等督飭高連陞王德榜劉典等軍乘勝進剿力拔漳城

並將雲霄平和等處次第掃蕩毋稍延緩硃口銅山均
係閩省海邊要口徐宗幹已調蕭瑞芳紅單船六號駛
赴硃口左宗棠又調吳全美統帶紅單拖罈等船四十
號駛赴銅山卽著催令星速到防並督飭該提督實力
嚴密梭巡不得稍有疏失石碼海澄等處卽飭楊鼎勛
等軍嚴密扼守以截侍逆南竄之路粵省之汕頭海口
瑞麟等亦當加意嚴防務臻周密將此由六百里諭知
瑞麟左宗棠徐宗幹郭嵩燾並傳諭孫長紱知之欽此

附陳蘇軍到閩日期片

再福建陸路提臣郭松林統帶蘇軍於三月初四初五等日陸續行抵廈門汀州鎮總兵沈俊德統帶楚軍亦於二月二十七日抵汀州除移飭郭松林沈俊德遵旨各赴本任一面妥籌布置相機防剿外臣謹附片陳明伏乞

聖鑒謹

奏

同治四年三月二十九日

軍機大臣奉

旨知道了欽此

請卹全家殉難之詔安趙知縣片

再據興泉永道鄧廷枏等轉據雲霄同知宋文斐稟報
逆賊前竄詔安縣境在離城里許西北一帶分紮三壘
偷挖地道三月初六日辰刻地礮轟發縣城失陷該縣
知縣趙人成全家殉難臣等伏查上年漳郡失守後平
和雲霄相繼淪陷詔安孤懸賊中不及派兵援應幸該
縣知縣趙人成督帶勇團會同署廣東黃岡協副將何
雲章嬰城固守六月屢挫賊鋒茲因地雷轟發縣城失
陷趙人成全家殉難並聞城破時家人欲抱其幼子逃

出趙人成以義不苟活亦令投井畢命死事情形尤爲慘烈合無仰懇

天恩俯准將同知銜福建詔安縣知縣趙人成

飭部照同知例從優議卹並於死事地方建立專祠其殉難家屬一併附祀以慰忠魂理合附片具

奏伏乞

聖鑒謹

奏同治四年三月二十九日

軍機大臣奉

才系卷二一
旨另有旨欽此

同治四年四月十五日內閣奉

上諭左宗棠等奏知縣全家殉難請旨優卹建祠等語
福建詔安縣知縣趙人成於賊匪圍攻縣城時嬰城固
守六月之久屢挫賊鋒本年三月初六日地雷轟發縣
城失陷該員全家殉難死事情形尤爲慘烈同知銜福
建詔安縣知縣趙人成著照同知例從優議卹並於死
事地方建立專祠其殉難家屬一併附祀以慰忠魂欽
此

舟師緝獲通賊洋匪解滬訊辦摺

奏爲舟師緝獲通賊洋匪委員解滬訊辦恭摺馳陳伏
祈

聖鑒事竊照廈門英領事柏威林與漳逆交通前經派
委前興泉永道曾憲德同福州口稅司美里登馳赴廈
門妥爲查辦

奏明在案茲據曾憲德稟報抵廈後往晤柏威林多方
開導柏威林雖言近支飾而亦頗生悔悟當告以一體
示禁洋人通賊不准一船駛近賊營違則開礮轟擊柏

威林亦允照辦隨親赴該國輪船見水師官靴姓帶有洋兵三百餘名砲位二十七尊聲勢頗壯稽查亦密中外各官情意和悅惟查漳南一帶濱臨大海欲斷賊之接濟莫如阻截港道卽添調勇船交已革安平協副將吳鴻源已革金門遊擊陳允彩等馳赴海澄石碼一帶巡查並經美里登將帶往洋兵安置車礮在岸駐守以資聯絡二月二十八日陳允彩在白水營見一小哨船挂帆而來行駛甚速守港舟師阻截不聽陳允彩知係賊船當率舟師追擊躍過彼船生擒長髮賊謝應瀧一

名洋人三名搜獲太平天國侍王李紅綢大旗一面護
照一張洋鎗五把洋銀四百九十六員解經曾憲德提
訊據謝應龍供稱係廣東香港人從賊已久逆首李世
賢現與洋人勾結遣往上海找尋逆眷並買大火輪船
圖至漳浦沿海爲竄颺之計等語其洋人三名卽邀同
美里登並廈稅司休仕會訊一名花耳卽手執印照者
一名僕低黎一名葛得勒俱合眾國人花耳供認前情
並稱李逆家眷聞爲洋將戈登畱養上海戈登回國斷
無將逆眷帶去之理所執印照係祇准在江蘇游歷僕

低黎等僅認販賣洋鎗不認買船之事三月初五日夜
陳允彩又在海門山港率勇船線民截獲濟賊匪船一
隻該匪放槍拒傷水勇一名並將船內貨物拋棄海內
陳允彩督同弁勇奮力圍捕生擒洋人五名一名木虱
係英國人一名漢梨布夫一名恆蠻加絨一名黑恰律
亦皆布國人一名不龍係合眾國人起獲洋鎗銅帽等
件美里登休仕會議英國人卽就近交廈門領事官照
例充軍不准再履中國其布國人同合眾國人一併解
赴上海道收訊跟追逆眷並照會各國領事究辦等情

先後具稟前來臣查該逆圖買輪船意殊叵測該員并等巡緝認真屢經弋獲賊目洋匪斷其接濟洵足以戢奸謀而杜勾結所獲洋匪本應比照金陵通賊章程立予懲辦惟前奉

上諭勅江蘇撫臣查照李秀成供詞查明李世賢眷屬下落覆奏等因現獲謝應瀧供爲李逆找尋家眷是否逆眷現尙羈留上海地方無從查問適署陸路提臣郭松林統帶蘇省援師由滬抵厦經該道等詢據面稱戈登畱養李逆家屬意在溧陽尋覓窖金非與李逆交好

惟花耳既爲李逆所用必知逆眷踪跡自應解滬跟追
上海合眾國西總領事照會駐廈爾領事文內亦以深
惡此輩違犯和約私通髮逆囑卽解滬懲辦當不致有
徇庇情事現在蘇師雲集廈門人心大定亦不至有意
外之虞洋匪花耳等七名業經曾憲德委員從九品葉
珍管解赴滬收審於三月十一日附塔輪船起程並經
稅司美里登另派洋哨護解相應請

旨勅下江蘇撫臣轉飭上海道澈底訊辦除飭將賊目
謝應瀧卽在廈門正法梟示並將起獲贓銀一併充賞

洋槍等件存船配用外臣等謹合詞恭摺馳

奏伏乞

皇太后

皇上聖鑒訓示再此摺由臣宗幹主稿合并聲明謹

奏同治四年三月二十九日

軍機大臣奏

旨總理各國事務衙門議奏欽此

請將會辦通逆洋匪之中外出力各員獎勵片

再查洋人有從廣東香港販運軍火至銅山附近地方

上岸接濟髮逆情事先經辦理廈門稅務鑲紅旗協領
廣星訪聞會商廈門稅司休士幫辦巴德榮雅國二名
通事汪蘇同知林鉞派撥開哨巡船馳往查拏迨道員
曾憲德同福州稅司美里登抵廈申明和約與休士等
悉心查辦旋查有英國火輪船名古董先於二月初十
日在銅山水面之虎頭山灣停泊經英國兵船這那士
眼見可証又洋關巡哨洋人米勒宅同哨丁至銅山該
處民人向訴該古董輪船私載火藥洋鎗登岸聲言百
姓如敢攔阻立即開砲轟擊等語復經英國六船佛冷

媽見該船在現被賊踞之漳浦地方搭載洋人七八名
往南而去三月初二日該船收泊廈口當即將其扣留
照會英領事柏威林訊問該船主因指証確鑿無可置
辦查英國第四十七條和約章程如非通商口岸洋船
私往買賣即將船隻入官等語該古董輪船違約濟匪
應卽照約入官現將旂幟水手人等一律更換配用巡
緝見証這那士等另行議給重賞以示鼓勵據協領廣
星道員曾憲德會稟前來臣等伏查該逆勾通洋人接
濟軍火購買輪船情形實爲巨測幸道員曾憲德馳赴

廈門會同福州稅司美里登廈門稅司休士與幫辦巴
德榮雅國認真查辦得以消患未萌現據曾憲德稟稱
美里登欲行回省休士欲行回國當此稽查嚴緊之際
該稅司等辦理妥協深明大義自應仍令其在廈會同
查辦以收全功美里登並親赴漳州軍營將車輪開花
砲借撥助勦並遣洋兵五十人隨同高連陞各營出隊
勦賊尤屬傾心報効信義堪嘉均應仰懇

天恩分別

獎賞以示優異廈門領事官柏威林此次隨同查辦一

切省知愧悟可否量予

獎勵俾免向隅出自

聖裁其前署興泉永道曾憲德係奉

旨交吏部帶領引

見之員上年因閩省軍務喫緊奏留差之此次辦理諸
事均臻妥協可否以道員仍留福建補用並

賞加按察使銜革職拏問金門水師遊擊陳允彩可否
免其拏問並開復原官其餘中外出力各員可否由臣
等查明分別彙案請

獎以昭激勵除咨總理衙門查照外臣等謹附片具陳
伏乞

聖鑒謹

奏

同治四年三月二十九日

軍機大臣奉

旨該衙門議奏欽此

陳請浙省應解甘餉仍飭改撥摺

奏爲浙省情形萬分竭蹶應解甘餉仍請

飭部改撥恭摺奏祈

聖鑒事竊照浙省前因軍需奇絀應解甘餉無從籌措
經前護撫臣蔣益澧

奏請

飭部另行改撥旋准戶部咨錄原奏內稱浙省地方凋
敝餉項支絀自係實在情形惟甘省需餉緊急浙省歷
年欠解甘餉一百四十餘萬兩前經奏准於前次奏撥

二三十萬兩內先籌銀十萬兩解往其餘奉撥銀兩陸續籌解似此量爲寬展限期自不致過形迫促且現今各省均有協撥甘餉並新疆軍餉實無可以改撥之處應請仍照前奏將前次奉撥甘餉二三十萬兩內先籌銀十萬兩迅解甘省交納其餘奉撥甘餉亦應儘力陸續籌解以濟要需等因於同治四年正月二十五日奉旨依議欽此飛咨到臣當卽飭司欽遵籌解在案茲據浙江布政使蔣益澧詳稱甘省軍情喫緊待餉孔殷自應竭力籌解何敢稍事諉延無如浙江全省均撮拾於

灰燼之餘民間受害情形雖有輕重之分而困苦凋殘則大率相類其被擾較重之區賑撫且尙不遑錢糧何能征解卽被擾較輕之處雖已免強催科而小民元氣已傷輸將亦難踴躍故隨時體察情形迭請蠲緩以致司庫進款較前倍絀至每月協撥援閩軍餉及留防各營旗糧餉並製造軍裝等項本省例支各款奉撥織造衙門承辦各項活計無定額之工料銀兩統計月需銀三十餘萬兩以目下進款計之實已萬分支絀所有奉撥甘餉斷難兼顧應仍請

奉咨改撥等情前來臣等伏查浙省新復地方悉力供
支援閩各軍已彌形竭蹶況奉撥楊岳斌行營銀八萬
兩已悉數起解是皆於無可設法之中竭力籌此鉅款
以至大局若再兼籌甘餉且將浙江全省未復以前歷
年積欠之款一併催解縱勉事搜羅亦斷不能集有成
數臣等忝任疆圉受

恩至渥值此甘省軍務繁興如有可籌之餉曷敢不盡
力籌維稍資協濟惟日甯浙省兵燹之餘情形萬分窘
迫不得不據實瀝情合無仰懇

天恩俯准將奉撥先需甘餉銀十萬兩

勅部仍另改撥俾免貽誤要需一俟閩省軍務告竣協
餉停止再儘力籌解甘餉理合恭摺附驛馳

奏伏

皇上三鑒訓示施行謹

奏同治四年三月二十九日

軍機大臣奉

旨戶部速儀具奏欽此